



Ina veritabla manifestaziun dal sistem da maiorz – L'anteriur cumin da la Cadi a Mustér.

FOTO SOMEDIA

# Nua èn restads ils adversaris?

Nagin comité per cumbatter il nov sistem electoral

MARTIN CABALZAR/FMR

**■ Malgrà che la PCD ed er exponents da PBD e PLD avessan preferì vinavant in sistem maschadà da maiorz e proporz, para l'opposiziun d'esser sa calmada uss avant la votaziun. Nagin na vul propi ir sin las barricadas cunter la soluziun da cumpromiss cun il proporz dubel, dentant cun mantegnair ils circuls electorals existents.** Oriundain avevan tant cristiandemocrats, liberals e burgais-democrats cumbatti il sistem dal proporz dubel. Era la maioritad da las regiuns e da las vischnancas eran s'exprimidas cunter en la procedura da consultaziun. Impressiunada da questas maioritads aveva schizunt la regenza la finala preferi il model maschadà.

La cumissiun preparatoria da Cussegl grond presidiada da Maurizio Michael (PLD Bregaglia) ha suenter lungas examinaziuns e debattas però dà la vieuta a la fatschenta cun proponer il model C, cun in proporz dubel che mantegna elements da maiorz per ils circuls pi-tschen. Questa varianta ha la finala er persvadi il Cussegl grond ch'è s'exprimì – cun 85 cunter 0 vuschs e 32 abstenzions (da protest da la PCD) – en favor dal proporz dubel. Tut las partidas – cun excepcion da la PCD che ha dà liber la vusch – recumondan uss la finala in gea per la votaziun dal pievel. Quai malgrà che in bun dumber da delegads da la PCD avessan preferi in NA.

Entant ch'i dat in comité cun vasta representanza sur las partidas a favor dal nov model, na vul nagin propi pli s'exponer publicamain encunter il model. Tuttina n'en singuls exponents betg cumentis e quintan dad anc s'exprimer cun brevs da lectur.

## Ignorà la voluntad dal pievel

In da quels che n'è da l'entschatta ennà betg stà cument cun la nova «proposta da cumpromiss» è stà deputà René Epp (PCD Cadi). Quai cun l'argument ch'il pievel grischun haja refusà otg giadas l'introducziun dal proporz. A ses avis avess ins pudì eleger vinavant tenor il sistem da maiorz en 32 dals 39 circuls electorals ed uschia tuttina ademplir las pretensiuns dal Tribunal federal. «Quest model fiss stà pli simpel, transparent e plausibel», punctuescha Epp envers la FMR. Persunas senza partida n'hajan cun il nov model nagina schanza da vegnir elegidas en il Cussegl grond. «Noss chantun na dovra betg elezioni da partidas e glistas, mabain buns e fermi chaus che s'engaschan per lur regiun e per in chantun attractiv», di René Epp. En scadin cas avess il pievel stuì avair la pussaivladad da pudair tscherner tranter duas variantas (proporz dubel e sistem maschadà). Tenor ses avis vegnia la voluntad dal pievel ignorada.

## «Decisiun disptaiva dal Tribunal federal»

Ferm adherents dal sistem actual n'hai oriundemain dentant betg mo dà en il ravugl da la PCD, mabain cunzunt era tar la PBD e tar ina maioritad da la PLD. Tenor Lorenz Alig (PLD Foppa) èsi schon paradox ch'il Tribunal federal po ignorar la voluntad dal suveran grischun ed er las decisiuns dal Parlament federal che ha la finala sancziunà la constituziun grischuna actuala. «Tenor mes avis han pievel e parlament da star sur las dretgiras e betg il cuntrari», di Lorenz Alig. Deplorablamain saja il proporz dubel probabel dentant la sulletta varianta che vegnia acceptada su-

enter la decisiun disptaiva dal Tribunal federal. Per evitar ulteriuras stgalias ed evitar che la regenza stoppià la finala far diever dal dretg d'urgenza cun ina soluziun provvisorica per las elezioni da la primavaira proxima, sa Lorenz Alig la finala viver cun il cumpromiss, damai che quel resguarda vinavant ina buna representanza da las valladas periferas. Quai saja la finala stà sia finamira principala.

## «In cumpromiss raschunaivel»

Il cler adherent dal maiorz e dal sistem actual è er stà oriundemain Rico Lamprecht (PBD Val Müstair) e sia partida: «Era sche la renunzia al sistem electoral existent è greva da chapir, n'avain nus la finala betg autres alternativas che d'acceptar il cumpromiss preschentà», di Rico Lamprecht. Suenter che la maioritad saja dentant stada pronta da mantegnair vinavant ils circuls existents sco unitads electoralas, haja la finala er el sostegni il proporz dubel. Quai er per evitar che l'iniziativa da reducir il parlament sin 90 vegnia puttamezza al pievel. «Questa iniziativa ch'avess probabel gì bunas schanzas da vegnir acceptada, avess mess anc pli fitg sut squitsch la representanza da las regiuns periferas» è Lamprecht persvadi. En 19 circuls cun sulet in sez en il Cussegl grond vegnia er vinavant elegida quel u quella che cuntanschia las bleiras vuschs. De facto saja quai pia er in tschert maiorz. Il mantegniment dals circuls electorals existents lubeschia da resguardar vinavant la varietad geografica, economica culturala e linguistica da noss chantun. Quai haja la finala persvadi el da sostegnair la proposta che ha chattà la maioritad en la cumissiun ed en il parlament.



«Nus n'avain betg alternativas al cumpromiss.»

Rico Lamprecht, deputà PBD

«Noss chantun dovrà buns e fermi chaus.»

René Epp, deputà PCD

«Pievel e parlament han da star sur las dretgiras e betg il cuntrari.»

Lorenz Alig, deputà PLD